

PODUGOVOR O FINANCIRANJU

za Projekat Električna distribucija BiH (2010-0562)- Izgradnja sistema pametnih mjerena u elektrodistribuciji

između

FEDERACIJE BOSNE I HERCEGOVINE

koju predstavlja

**FEDERALNO MINISTARSTVO FINANSIJA
FEDERALNO MINISTARSTVO FINANCIJA**

i

**JAVNOG PODUZEĆA ELEKTROPRIVREDA
HRVATSKE ZAJEDNICE HERCEG-BOSNE D.D. MOSTAR**

Sarajevo, _____. 2014. godine

PODUGOVOR O FINANCIRANJU

Zaključen dana _____.2014. godine između **Federacije Bosne i Hercegovine**, (u daljem tekstu: Federacija), koju predstavlja Federalno ministarstvo finansija-Federalno ministarstvo financija i **Javnog poduzeća Elektroprivreda Hrvatske zajednice Herceg-Bosne d.d. Mostar** (u daljem tekstu: EPHZHB) za realizaciju Projekta Električna distribucija BiH (2010-0562)-Izgradnja sistema pametnih mjerena u elektrodistribuciji (u daljem tekstu: Projekat).

PREAMBULA

BUDUĆI DA je dana 19.05.2014. godine u Sarajevu i 05.06.2014. godine u Luksemburgu između Bosne i Hercegovine (u daljem tekstu: Zajmoprimac) i Europske investicijske banke (u daljem tekstu: Banka) zaključen Ugovor o financiranju (u daljem tekstu: Ugovor o financiranju), kojim je Banka dala suglasnost da Zajmoprimcu stavi na raspolaganje kredit (u daljem tekstu: Kredit), pod uvjetima koji su navedeni u Ugovoru o financiranju;

BUDUĆI DA je dana _____. godine između Zajmoprimca i Federacije zaključen Supsidijarni sporazum (u daljem tekstu: Supsidijarni sporazum);

BUDUĆI DA je Vlada Federacije Bosne i Hercegovine utvrdila prijedlog Odluke, a Predstavnički dom i Dom naroda Parlamenta Federacije Bosne i Hercegovine usvojili Odluku o prihvaćanju zaduženja po Ugovoru o financiranju između Zajmoprimca i Banke za realizaciju Projekta ("Službene novine Federacije BiH", br:_____),

OVIM su se strane složile o sljedećem:

Članak 1.

- 1.1. Federacija i EPHZHB su se usuglasili da će se svi pojmovi, uvjeti i rokovi iz Ugovora o financiranju ***mutatis mutandis*** primjenjivati u punoj snazi i učinku na ovaj Podugovor o financiranju (u daljem tekstu: Podugovor), uključujući i Smjernice za borbu protiv korupcije.
- 1.2. Federacija je suglasna da EPHZHB proslijedi sredstva kredita u ukupnom iznosu od 20.000.000,00 EUR-a, a EPHZHB se obvezuje platiti ugovorenu kamatu, naknade i troškove, te vratiti cijelokupan iznos kredita, pod uvjetima, rokovima i na način kako je utvrđeno Ugovorom o financiranju i ovim Podugovorom.
- 1.3. Sredstva kredita će se koristiti za izgradnju i rekonstrukciju transformatorskih stanica s ciljem smanjenja tehničkih gubitaka električne energije i poboljšanja naponskih prilika, rekonstrukcija i izgradnja niskonaponskih mreža, nabavka i ugradnja obračunskih električnih brojila za potrebe domaćinstava, koja imaju mogućnost daljinskog očitavanja utrošene električne energije, te daljinskog isključenja i uključenja potrošača sa svođenjem na postojeći AMR centar

Članak 2.

- 2.1. Sredstva kredita iz Članka 1.2. ovog Podugovora, EPHZHB će otplaćivati Federaciji, pod slijedećim uvjetima i rokovima:
 - iznos kredita.....20.000.000,00 EUR
 - rok otplate.....do 25 godina
 - grace period.....do 6 godina
 - dospijeća.....godišnja ili polugodišnja rata u jednakim otplatama glavnice, u anuitetima
 - iznos svake tranše.....minimalno 5.000.000,00 EUR
 - kamatna stopa.....fiksna ili varijabilna, s fiksnim intervalom (dogovara se prije isplate tranše)
- 2.2. Iz sredstava kredita ne mogu se plaćati carine, porezi i druge dažbine.
- 2.3. EPHZHB će plaćati i sve druge troškove koji nastanu u vezi ovog Podugovora.

Članak 3.

- 3.1. EPHZHB se obvezuje vratiti Federaciji ukupan iznos sredstava kredita zajedno s pripadajućom kamatom i svim ostalim troškovima, a u skladu s uvjetima definiranim Ugovorom o financiranju i ovim Podugovorom.
- 3.2. U slučaju da EPHZHB ne plati bilo koji dospjeli iznos u skladu sa Podugovorom na datum dospijeća, dužan je platiti kamatu na takav neplaćeni iznos od datuma dospijeća sve do datuma stvarnog plaćanja, po godišnjoj stopi jednakoj zateznoj kamatnoj stopi u Federaciji, odnosno počinje se obračunavati sedmog dana od prijema obavijesti za plaćanje od strane Federacije.
- 3.3. Ako neki od datuma otplate kredita ne bude Radni dan, plaćanje će se odgoditi za prvi slijedeći dan koji je Radni dan u Federaciji.

- 3.4. Za svako povlačenje sredstava EPHZHB će dostaviti Federaciji (ili osobi koju ministar financija odredi kao ovlaštenu osobu) i Banci originalnu potvrdu u kojoj će navesti iznos ekvivalentan vrijednosti robe, radova i usluga koji se financiraju od tog povlačenja sa sadržajem zadovoljavajućim za Federaciju i za Banku.

Članak 4.

- 4.1. EPHZHB se obvezuje da će platiti Federaciji svaku tranšu po dospijeću na datum naveden u obavještenju o isplati.
- 4.2. Plaćanje glavnice, kamate, provizije, administrativnih troškova kod prijevremene otplate, nepredviđenih troškova i zatezne kamate koji se odnose na ovaj Podugovor, kao i bilo koja druga plaćanja prema ovom Podugovoru, vršiti će se u valuti Kredita, po vrijednosti na dan dospijeća i prema instrukciji Federacije.
- 4.3. EPHZHB će isplatiti Federaciji sve iznose koji dospijevaju i plativi su po ovom Podugovoru, i to najkasnije 15 (petnaest) dana od prijema zahtjeva.

Članak 5.

- 5.1 U svrhu osiguranja naplate svih tražbina po ovom Podugovoru, EPHZHB je obvezna da u roku od 15 (petnaest) dana od potpisivanja ovog Podugovora dostavi Federaciji 25 (dvadesetpet) vlastitih bjanko mjenica sa klauzulom „bez protesta“ i mjeničnom izjavom ovjerenom i potpisom od strane ovlaštenog lica. Na osnovu ove ugovorne odredbe EPHZHB ovlašćuje Federaciju da primljene bjanko mjenice može koristiti za naplatu dospjelog potraživanja po ovom Podugovoru. U tom slučaju ovlašćuje se Federacija da može u primljenu bjanko mjenicu upisati iznos svih dospjelih potraživanja na dan popunjavanja mjenice, zatim datum dospijeća, domicilirati je po svojoj volji, upisati sve druge nedostajuće sastojke, te je podnijeti na isplatu, odnosno da mjenicom može provesti sve druge propisane radnje radi naplate mjeničnog potraživanja.

Članak 6.

- 6.1. EPHZHB je obvezna, najmanje tromjesečno, dostavljati izvještaje o povlačenju i trošenju sredstava kredita, kao i izvještaj o realizaciji Projekta, izvršenju svojih obveza po ovom Podugovoru i drugim pitanjima koja se odnose na ciljeve Projekta. Ovakve izvještaje EPHZHB dostavlja Federaciji i Banci.
- 6.2. EPHZHB će uspostaviti sustav finansijskog upravljanja, uključujući podatke i račune i pripremati finansijske izvještaje koji će davati dovoljno informacija za odgovarajuće upravljanje, sve u skladu sa standardima računovodstva prihvatljivim za Banku i Federaciju, koji se konzistentno primjenjuju, i adekvatno odražavaju sve njene operacije i finansijske uvjete i bilježenje posebno operacija, izvora i troškova koji se odnose na Projekat.
- 6.3. EPHZHB će imati zapisnike, račune i revidirane finansijske izvještaje za svaku fiskalnu godinu, u skladu s odgovarajućim principima revizije koja se stalno primjenjuje od strane nezavisnih revizora prihvatljivim za Banku i Federaciju i predočiti Banci i Federaciji ne kasnije od šest (6) mjeseci nakon kraja svake takve godine, ovjerene kopije revidiranih finansijskih izvještaja za takvu godinu i izvještaj o takvoj reviziji od strane navedenih revizora, u obujmu i detaljima koje Banka i Federacija budu razumno tražili.

- 6.4. EPHZHB će, dostavljati Banci i Federaciji sve informacije i dokumentaciju o Projektu i njegovom napredovanju, kao i okolnostima koje ometaju ili ozbiljno ugrožavaju provođenje i cilj Projekta.
- 6.5. EPHZHB je dužna osigurati, i na zahtjev, pružiti Banci ili Federaciji dokaz da su pokriveni svi troškovi koji se plaćaju iz sredstava kredita.
- 6.6. EPHZHB će koristiti svoja prava po ovom Podugovoru na takav način da zaštiti interese Federacije i Banke i postigne svrhu Projekta i neće pripisivati, dodavati ili odreći se bilo koje odredbe ovog Podugovora, osim ukoliko se Banka i Federacija ne dogovore drugačije.

Članak 7.

- 7.1. Federacija će poduzeti ili prouzročiti da se poduzmu sve neophodne i odgovarajuće radnje da se dozvoli EPHZHB nesmetano izvršavanje njenih obveza po ovom Podugovoru i neće poduzimati radnje koje bi spriječile njegovo neometano postupanje.
- 7.2. Federacija će u potpunosti izvršiti svoje obveze po Ugovoru o financiranju, Supsidijarnom sporazumu i ovom Podugovoru, i ukoliko se drugačije ne bude zahtjevalo neće poduzimati bilo koje aktivnosti koje imaju efekat dopune, izmjene, prenošenja ili napuštanja ovog Podugovora ili bilo koje njegove odredbe.
- 7.3. Ako pravo Federacije da vrši povlačenja sredstava kredita bude suspendirano ili otkazano, onda i pravo EPHZHB da vrši povlačenja može na isti način i istovremeno biti suspendirano ili otkazano od strane Federacije, ovisno od datog slučaja.

Članak 8.

- 8.1. Federalni ministar finansija - federalni ministar financija ili svaka osoba ili osobe koje ministar finansija-financija ovlasti pisanim putem u ovu svrhu može, u ime Federacije, poduzeti aktivnosti ili provesti dokument zahtijevan ili dozvoljen ovim Podugovorom.
- 8.2. Generalni direktor EPHZHB, ili svaka osoba ili osobe koja je valjano ovlaštena pisanim putem od strane generalnog direktora u ovu svrhu može, u ime EPHZHB, poduzeti aktivnosti ili provesti dokument zahtijevan ili dozvoljen ovim Podugovorom.

Članak 9.

- 9.1. Na sve što nije regulirano ovim Podugovorom, primjenjivat će se odredbe Zakona o obveznim odnosima kao i odredbe drugih važećih zakona u Federaciji.
- 9.2. Svi sporovi koji budu nastali po osnovu ovog Podugovora ili u vezi sa istim, a koji se ne mogu sporazumno rješiti između Federacije i EPHZHB, konačno će se rješiti pred nadležnim sudom u Sarajevu.
- 9.3. Kada ukupan iznos Kredita bude otplaćen i kada kamata i provizije narasle po Kreditu budu plaćene, ovaj Podugovor i sve obveze ugovornih strana će time prestati važiti.

- 9.4. Ako bilo koja odredba ovog Podugovora bude nevažeća, to neće utjecati na valjanost ostalih odredaba. Bilo koji nedostatak koji iz toga proizađe bit će popunjeno odredbom u skladu sa svrhom ovog Podugovora.
- 9.5. Ukoliko se ne ispune ili djelomično ispune uvjeti predviđeni ovim Podugovorom ili bilo koje obveza koja proizlazi iz ovog Podugovora sporazumne strane mogu raskinuti ovaj Podugovor.
- 9.6. Sporazumne strane mogu raskinuti ovaj Podugovor, posebnim Ugovorom o raskidu između Federacije i EPHZHB, koji mora biti u pismenoj formi i u kojem će biti regulirane sve posljedice takvog raskida.
- 9.7. Ukoliko nastupi neki od razloga za raskid, Federacija će pismenim putem pozvati EPHZHB da u roku od 30 dana od dana prijema obavijesti otkloni nastali razlog za raskid Podugovora.
- 9.8. Ukoliko EPHZHB u predviđenom roku iz ovog članka ne udovolji zahtjevu Federacije i ne otkloni razlog za raskid, Federacija ima pravo jednostrano raskinuti ovaj Podugovor izjavom o raskidu, koja će biti dostavljena EPHZHB preporučenom poštom (s povratnicom). Podugovor će se smatrati raskinutim nakon proteka otkaznog roka od 30 dana koji počinje teći od dana dostave izjave o raskidu.
- 9.9. U slučaju da ovaj Podugovor bude raskinut zbog povrede ugovornih obveza od strane EPHZHB, odnosno iz razloga ne ispunjavanja ili djelomičnog izvršenja, EPHZHB će biti odgovorna za svu štetu koja može nastati Federaciji bilo direktno ili indirektno, zbog takvog raskida, te obeštetiti Federaciju za nastalu direktnu štetu i to do visine dokumentiranih i razumnih troškova u vezi izvršenja ovog Podugovora.
- 9.10. Raskidom Podugovora, ugovorne strane se oslobođaju obveza, izuzev finansijskih obveza EPHZHB koje su proistekle potpisivanjem ovog Podugovora, uz obveze naknade štete Federaciji iz stava 9.9. ovog članka.
- 9.11. Banka i Federacija se obvezuju pismeno obavijestiti drugu ugovornu stranu o svim svojim statusnim promjenama u periodu trajanja Podugovora. Ukoliko dođe do statusnih promjena, Banka i Ministarstvo se obvezuju da će oni ili njihovi pravni slijednici izvršiti sve obveze iz ovog Ugovora.
- 9.12. U slučaju prijenosa ili ustupanja, preuzimatelj prava i/ili obveza će pristupiti ovom Podugovoru i postati Krajnji korisnik kao da je bio imenovana ugovorna strana na dan potpisivanja ovog Podugovora, i ima ista prava, obveze i ugovornu poziciju kao ranija ugovorna strana.

Članak 10.

- 10.1. Svaka obavijest, traženje ili zahtjev potreban ili dozvoljen da se da ili podnese po ovom Podugovoru će biti u pisanim oblicima i smatrati će se da je dat ili podnesen kada bude dostavljen na ruke, poštom ili telefaksom na adresu niže naznačene osobe ili na bilo koju drugu adresu koju će ta osoba naznačiti u pisanim oblicima strani koja daje obavijest ili podnosi zahtjev:

Za Federaciju Bosne i Hercegovine:

Federalno ministarstvo finansija/financija
Mehmeda Spahe 5
71000 Sarajevo

Na pažnju: Ministar

Telefax: +387 33 203 152

Za JP Elektroprivreda HZ HB d.d. Mostar:

Za JP Elektroprivreda HZ HB d.d. Mostar
Ulica Mile Budaka 106 A Mostar
88 000 Mostar, BiH

Na pažnju: Generalnog direktora

Tel: 036/ 335 700; Faks: 036/ 335 777

10.2 Ako se bilo koja od gornjih adresa i/ili imena promijene, strane su o tome dužne odmah obavijestiti drugu ugovornu stranu pismeno o novim adresama/i ili imenima.

Članak 11.

- 11.1. Sva obavještenja, zahtjevi i drugi dopisi u vezi sa ovim Podugovorom, ugovorne strane će sačiniti u pisanoj formi, osim ako ovim Podugovorom nije drugačije određeno.
- 11.2. Ovaj Podugovor je sačinjen u 4 (četiri) istovjetna primjerka, od kojih svaka strana zadržava po 2 (dva).
- 11.3. Ovaj Podugovor stupa na snagu danom njegovog potpisivanja od strane ovlaštenih zastupnika ugovornih strana i ostaje na snazi sve dok se njegove odredbe u potpunosti ne ispune.

FEDERACIJA BOSNE I HERCEGOVINE

**JP ELEKTROPRIVREDA HZ HB
D.D. MOSTAR**

Federalno ministarstvo finansija/ financija

Ministar
Ante Krajina

Br: _____

Generalni direktor
Nikola Krešić

Br: _____